

遼史卷四十一

元中書右丞相總裁托克托等修

志第十一

地理志五

西京道

西京大同府陶唐冀州之域虞分并州夏復屬冀州周職方正北
曰并州戰國屬趙武靈王始置雲中郡秦屬代王國後爲平城縣
魏屬新興郡晉仍屬雁門劉琨表封猗盧爲代王都平城元魏道
武於此遂建都邑孝文帝改爲司州牧置代尹遷都洛邑改萬年
又置恒州高齊文宣帝廢州爲恒安鎮今謂之東城尋復恒州周
復恒安鎮改朔州隋仍爲鎮唐武德四年置北恒州七年廢貞觀
十四年移雲中定襄縣於此永淳元年摩多原作默啜爲民患移民朔

州開元十八年置雲中州天寶元年改雲中郡乾元元年曰雲州
乾符三年大同軍節度使李國昌子克用爲雲中守捉使殺防禦
使據州以聞僖宗赦克用以國昌爲大同軍防禦使不受命廣明
元年李琢攻國昌國昌兵敗與克用奔北地黃巢入京師詔發代
北軍尋赦國昌使討賊克用率三萬五千騎而南收京師功第一
國昌封隴西郡王國昌卒克用取雲南旣而所向失利乃卑詞厚
禮與太祖會於雲州之東城謀大舉兵攻梁不果克用子存勗滅
梁是爲唐莊宗同光三年復以雲州爲大同軍節度使晉高祖代
唐以契丹有援立功割出前代北地爲賂大同來屬因建西京敵
樓棚櫓具廣袤二十里門東曰迎春南曰朝陽西曰定西北曰拱
極元魏宮垣占城之北面雙闕尙在遼旣建都用爲重地非親王
不得主之清寧八年建華嚴寺奉安諸帝石像銅像又有天王寺

留守司衙南曰西省北門之東曰大同府北門之西曰大同驛初爲大同軍節度重熙十三年升爲西京府曰大同統州二縣七

大同縣本大同川地重熙十七年西夏犯邊析雲中縣置戶一萬

雲中縣趙置沿革與京府同戶一萬

天成縣本極塞之地魏道武帝置廣牧縣唐武德五年置定襄縣遼析雲中置在京北一百八十里戶五千

長青縣本白登臺地冒頓單于縱精騎三十餘萬圍漢高帝於白登七日卽此遼始置縣有青陂梁元帝橫吹曲云朝跋青陂暮上白登在京東北一百一十里戶四千

奉義縣本漢陶林縣地後唐武皇與太祖會此遼析雲中置戶三千

懷仁縣本漢沙南縣元魏葛榮亂縣廢隋開皇二年移雲內於此大業二年置大利縣屬雲州改屬定襄郡隋末陷突厥李克用敗赫連鐸駐兵于此遼改懷仁在京南六十里戶三千

懷安縣本漢夷輿縣地歷魏至隋爲突厥所據唐克頡利縣遂廢爲懷荒鎮高勲鎮燕奏分歸化州文德縣置初隸奉聖州後來屬在州西北二百八十里戶三千

宏州博寧軍下刺史東魏靜帝置北靈邱縣唐初地陷突厥開元中置橫野軍安邊縣天寶亂廢後爲襄陰村統和中以寰州近邊爲宋將潘美所破廢之乃於此置宏州初軍曰永寧有桑乾河白道泉白登山亦曰火燒山有火井統縣二

永寧縣戶一萬

順聖縣本魏安塞軍五代兵廢高勲鎮幽州奏景宗分永興

縣置初隸奉聖州在州西北二百八十里戶三千

德州下刺史唐會昌中以西德店置德州開泰八年以漢戶復置有步落泉金河山野狐嶺白道坂縣一

宣德縣本漢桐過縣地屬雲中郡後隸定襄郡漢末廢高齊置紫阿鎮唐會昌中置縣戶三千

豐州天德軍節度使秦爲上郡北境漢屬五原郡地磧鹵少田疇自晉永嘉之亂屬赫連勃勃後周置永豐鎮隋開皇中升永豐縣改豐州大業七年爲五原郡義寧元年太守張遜奏改歸順郡唐武德元年爲豐州總管府六年省遷民於白馬縣遂廢貞觀四年分靈州境置豐州都督府領蕃戶天寶初改九原郡乾元元年復豐州後入回鶻會昌中克之後唐改天德軍太祖神冊五年攻下更名應天軍復爲州有大鹽灤九十九泉沒越灤古磧口青塚卽

王昭君墓兵事屬西南面招討司統縣二

富民縣本漢臨戎縣遼改今名戶一千三百

振武縣本漢定襄郡盛樂縣背負陰山前帶黃河元魏嘗都盛
樂卽此唐武德四年克突厥建雲中都督府麟德三年改單于
大都督府聖厯元年又改安北都督開元七年割隸東受降城
八年置振武軍節度使會昌五年爲安北都護府後唐莊宗以
兄嗣本爲振武節度使太祖神冊元年伐托歡原作吐渾還攻之盡
俘其民以東唯存鄉兵三百人防戍後更爲縣

雲內州開遠軍下節度本中受降城地遼初置代北雲朔招討司

改雲內州清寧初升有威塞軍古哈屯

原作可敦

城大同州天安軍永

濟柵安樂戍拂雲堆兵事屬西南面招討司縣二

柔服縣

寧人縣

天德軍本中受降城唐開元中廢橫塞軍置天安軍於大同川乾元中改天德軍移永濟柵今治是也太祖平党項遂破天德盡掠吏民以東後置招討司漸成井邑乃以國族爲天德軍節度使有黃河黑山峪廬城威塞軍秦長城唐長城又有牟那山鉗耳觜城在其北

寧邊州鎮西軍下刺史本唐隆鎮遼置兵事屬西南面招討司奉聖州武定軍上節度本唐新州後唐置團練使總山後八軍莊宗以弟存矩爲之軍亂殺存矩于祁州擁大將盧文進亡歸太祖克新州莊宗遣李嗣源復取之同光二年升威塞軍石晉高祖割獻太宗改升有兩河會溫泉龍門山涿鹿山東南至南京三百里西北至西京四百四十里兵事屬西京都部署司統州三縣四

永興縣本漢涿鹿縣地黃帝與蚩尤戰於此戶八千

礬山縣本漢軍都縣山出白綠礬故名有礬山桑乾河在州南六十里戶三千

龍門縣有龍門山石壁對峙高數百尺望之若門徼外諸河及沙漠潦水皆於此趣海雨則俄頃水踰千仞晴則清淺可涉實塞北控扼之衝要也在州東北二百八十里戶四千

望雲縣本望雲川地景宗於此建潛邸因而成井肆穆宗崩景宗入紹國統號御莊後置望雲縣直隸章愍宮附庸于此在州東北二百六十里戶一千

歸化州雄武軍上刺史本漢下洛縣元魏改文德縣唐升武州僖宗改毅州後唐太祖復武州明宗又爲毅州潞王仍爲武州晉高祖割獻于遼改今名有桑乾河會河川愛陽川炭山又謂

之陘頭有涼殿承天皇后納涼於此山東北三十里有新涼殿
景宗納涼於此唯松柵數陘而已斷雲嶺極高峻故名州西北
至西京四百五十里統縣一

文德縣本漢女祁縣地元魏置戶一萬

汗

原作汗

州清平軍下刺史本漢潘縣元魏置北齊置北燕郡改

懷戎縣隋廢郡屬涿郡唐武德中復置北燕州縣仍舊貞觀八
年改嬀州五代時奚王去諸以數千帳欲嬀州自別爲西奚號
汗

原作汗

州太祖因之有嬀泉在城中相傳舜嬪二女於此又有
溫泉版泉磨笄山雞鳴山喬山厯山統縣一

懷來縣本漢懷戎縣太祖改戶三千

儒州縉陽軍中刺史唐置後唐同光二年隸新州太宗改奉聖
州仍屬有南溪河沽河宋王峪桃峪口統縣一

縉山縣本漢廣寧縣地唐天寶中割媯州縣置戶五千

蔚州忠順軍上節度周職方并州川曰漚夷在州境飛狐縣趙襄子滅代武靈王置代郡項羽徙趙歇爲代王歇還趙立陳餘王代漢韓信斬餘復置代郡文帝初封代皆此地周宣帝始置蔚州隋開皇中廢唐武德四年復置至德二年改興唐縣乾元元年仍舊大中後朱邪執宜爲刺史有功賜姓名李國昌子克用乞爲留後僖宗不許廣明初攻敗國昌代北無備太祖來攻克之俘掠居民而去石晉獻地升忠順軍後更武安軍統和四年入宋尋復之降刺史隸奉聖州升觀察復忠順軍節度兵事屬西京都部署司統縣五

靈仙縣唐置興唐縣梁改隆化縣後唐同光初復置晉改今名

戶二萬

定安縣本漢東安陽縣地久廢後唐太祖伐劉仁恭次蔚州晨霧晦暝占不利深入會雷電大作燕軍解去卽此遼置定安縣西北至州六十里戶一萬

飛狐縣後周大象二年置廣昌縣于五龍城卽此隋仁壽元年改名飛狐相傳有狐於紫荆嶺食五粒松子成飛仙故云西北至州一百四十里戶五千

靈邱縣漢置後漢省東魏復置屬靈邱郡隋開皇中罷郡來屬大業初改隸代州唐武德六年仍舊東北至州一百八十里戶三千

廣陵縣本漢延陵縣隋唐爲鎮州後唐同光初分興唐縣置石晉割屬遼東南至州四十里戶三千

應州彰國軍上節度唐武德中置金城縣後改應州後唐明宗州

人也天成元年升彰國軍節度興唐軍寰州隸焉遼因之北龍首山南雁門兵事屬西京都部署司統縣三

金城縣本漢陰館縣地漢末廢爲陰館城大業末陷突厥唐始置金城縣遼因之戶八千

渾源縣唐置有渾源川在州東南一百五十里戶五千

河陰縣本漢陰館縣地初隸朔州清寧中來屬戶三千

朔州順義軍下節度本漢馬邑縣地元魏孝文帝始置朔州在今州北三百八十里定襄故城葛榮亂廢高齊天保六年復置在今州南四十七里新城八年徙馬邑卽今城武成帝置北道行臺周武帝置朔州總管府隋大業三年改馬邑郡唐武德四年復朔州遼升順義軍節度兵事屬西京都部署司統州一縣三

鄯陽縣本漢定襄縣地建安中置新興郡元魏置桑乾郡高齊

置招遠縣郡仍舊隋開皇三年罷郡隸朔州大業元年初名鄯陽縣遼因之戶四千

寧遠縣齊天保六年於朔州西置招遠縣唐乾元元年改今名遼因之有寧遠鎮東至朔州八十里戶二千

馬邑縣漢置屬鴈門郡唐開元五年析鄯陽縣東三十里置大同軍倚郭置馬邑縣南至朔州四十里戶三千

武州宣威軍下刺史趙惠王置武川塞魏置神武縣唐末置武州唐改毅州重熙九年復武州號宣威軍統縣一

神武縣魏置晉改新城後唐太祖生神武川之新城卽此初隸朔州後置州併寧遠爲一縣來屬戶三千

東勝州武興軍下刺史隋開皇七年置勝州大業五年改榆林郡唐貞觀五年於河南地置決勝州故謂此爲東勝州天寶七年又

爲榆林郡乾元元年復爲勝州太祖神冊元年破振武軍勝州之民皆趨河東州廢晉割代北來獻復置兵事屬西南面招討司統縣二

榆林縣

河濱縣

金肅州重熙十二年伐西夏置割燕民三百戶防秋軍一千實之屬西南面招討司

河清軍西夏歸遼開直路以趨上京重熙十二年建城號河清軍徙民五百戶防秋兵一千人實之屬西南面招討司

遼史卷四十一考證 地理志五

唐武德四年置北恒州 按唐書作元年

長青縣本白登臺地 按金史作長清

寧人縣 按金史作寧仁

同光二年升威塞軍 按通考作威勝

蔚州唐武德四年復置至德二年改興唐縣 按唐書地理志蔚

州興唐郡本安邊郡唐初沒突厥武德六年置州僑治貞觀五

年破突厥復故地還治靈邱開元初徙治安邊至德二載更郡

名復故治與史異

鄯陽縣 按唐書通考俱作善陽

唐改毅州 按通考唐末置屬河東道後唐改爲毅州史脫後字

榆林縣河濱縣 按唐書地理志榆林縣有隋故榆林宮東有榆

林關貞觀十二年置又通考河濱縣漢河南縣地唐置東臨河
岸爲名